

ARLeF: un premi pe zovine Rossella Dosso

La sô tesine di maturitât e tratave de valorizazion dal furlan e de furlanetât di Gurize puartade indenant dal storic Liceu Classic dal cjâf lûc dal Friûl Orientâl, tra la fin dal '800 e il principi dal '900

Rossella Dosso, di Caprive, 20 agns, ancje se e je une vore zovine, e je za une frescje scritore pluripremiade. Ai ricognossiments vûts intal passât, cumò si è zontât chel de ARLeF (Agjenzie Regjonâl pe Lenghe Furlane) che al à un significât particolâr. Di fat, la Agjenzie e à volût premiâ il lavôr di ricercje fat di Rossella te ocasion dal so diplome di maturitât classiche, otignût, intal an scolastic 2017-2018, li dal Liceu Classic "D. Alighieri" di Gurize. Un aprofondiment sul rûl che il storic Liceu Classic dal cjâf lûc dal Friûl Orientâl (in chê volte Staatsgymnasium) al à vût inte valorizazion de lenghe furlane e inte definizion de furlanetât di Gurize, tra la fin dal '800 e il principi dal '900 (in chei agns, par esempi, il Staatsgymnasium al classificave i siei students, su la fonde des lôr nazionalitâts, in: slovens, furlans, talians e todescs). Un aspjet storic, par altri, che al jere za stât aprofondît, intal passât, di bande un antenât di Rossella.

"L'impegn dai students, di cualsisedi etât e grât, rispjet al cjamp de lenghe furlane al è daûr a afermâsi cun grande positivitât intal setôr scolastic – al dîs il president de ARLeF, Eros Cislino –. Dispès a rivin notiziis che a incoragjin e che a testimonein la grande determinazion e l'interès tal aprofondî lis tematichis linguistichis e storichis: chest, fat di Rossella, al è un lavôr che al inricjîs i studis su la furlanetât di Gurize dulà che, par altri, intal mê di Avrîl passât, la Agjenzie e à coordinât e sostignût lis iniziativis pe Fieste de Patrie, propit par esaltâ la grande impuartance dal teritori gurizan."

Rossella Dosso, che cumò e je iscritte al prin an de Facoltât di Economie Aziendâl li de Universitât dal Friûl, intal 2017 e à za vinçût, inte categorie students, la prime edizion dal concurs leterari di San Zorç di Noiâr "Vôs de Basse", cuntune conte par furlan. Prime, e veve vinçût altris premis leteraris a Cormons, Sclose, Gussola (Cremona), Rodallo (Turin) e Roncadelle (Brescia).

Udin, ai 31 di Mai dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<